
Gadaian : Hukum dan Perbezaan Antara Sistem Al-Rahnu Dengan Sistem Konvensional

Mohamad Hazli bin Ismail¹

Akli bin Ahmad, Ph.D²

Abstrak

Gadaian merupakan sistem hutang bercagar untuk memudahkan peminjam mendapatkan sumber kewangan bagi tujuan keperluan. Lazimnya, gadaian akan dilakukan oleh mereka yang sangat memerlukan sumber kewangan atau peminjam adalah orang yang kurang dikenali oleh pembiaya. Gadaian adalah hutang. Oleh yang demikian apa yang berlaku pada hutang boleh berlaku kepada gadaian seperti penangguhan bayaran, nilai bayaran balik, status pegangan hutang dan juga riba. Dalam Islam, gadaian adalah dibenarkan dengan beberapa syarat yang bertujuan mengelak daripada unsur penipuan (*gharār*), penganiayaan dan riba. Justeru sistem al-Rahnu dibangunkan di Malaysia. Kertas kerja ini bertujuan untuk membincangkan hukum gadaian di sisi mazhab yang empat, sejarah al-Rahnu di Malaysia serta perbezaan sistem al-Rahnu berbanding sistem konvensional. Semoga kertas kerja ini dapat memberi pengetahuan kepada masyarakat muslim khususnya hukum-hakam berkaitan dengan gadaian.

Kata kunci : Gadaian, al-Rahnu dan Konvensional.

¹ Merupakan Pensyarah di Kulliyah Usuluddin dan Sains Al-Quran UniSHAMS dan sedang mengikuti pengajian di peringkat Doktor Falsafah Syariah dan Undang-undang UniSHAMS

² Merupakan Pensyarah Kanan di Kulliyah Syariah dan Undang-undang UniSHAMS, dan merupakan Dekan Kulliyah Syariah dan Undang-undang UniSHAMS

Pengenalan

Gadaian atau الرَّهْنُ ﴿ dari segi bahasa ialah tetap, dan tahan.³ Adapun dari segi syarak ia bermaksud menjadikan sesuatu barang yang berharga menurut syarak sebagai cagaran hutang yang diambil, agar ia dapat ditebus kembali dengan barang gadaian tersebut samada semua atau separuh hutang jika sekiranya ia gagal dibayar sepetimana yang telah dijanjikan.⁴

Harus melakukan gadaian samada ketika musafir atau ketika bermuqim (*hāqir*). Keharusan ini adalah berdasarkan kepada dalil hadis Nabi SAW di mana baginda Nabi pernah melakukan gadaian dengan mencagar baju besi milik baginda SAW kepada seorang Yahudi yang dikenali dengan nama Abū al-Syahmi untuk mengambil gandum sebagai makanan ahli keluarga baginda Nabi SAW.

Ini sebagaimana hadis yang diriwayatkan oleh Anas bin Mālik RA menceritakan bahawa;

﴿ وَلَقَدْ رَهَنَ النَّبِيُّ صَلَّى اللَّهُ عَلَيْهِ وَسَلَّمَ دِرْعًا لَهُ بِالْمَدِينَةِ عِنْدَ يَهُودِيٍّ وَأَخْذَ مِنْهُ شَعِيرًا لِأَهْلِهِ ﴾⁵

Maksudnya;

“Sesungguhnya Nabi SAW menggadaikan baju besinya ketika di Madinah kepada seorang Yahudi, dan baginda mengambil daripadanya gandum untuk ahli keluarga baginda”

Sebagaimana juga hadis yang diriwayatkan oleh Saidatina ‘Āisyah RA bahawa beliau berkata;

﴿ اشْتَرَى رَسُولُ اللَّهِ صَلَّى اللَّهُ عَلَيْهِ وَسَلَّمَ مِنْ يَهُودِيٍّ طَعَاماً وَرَهَنَهُ دِرْعَةً ﴾⁶

Maksudnya;

“Rasulullah SAW pernah membeli makanan daripada seorang Yahudi, dan baginda menggadaikan baju besi miliknya kepada Yahudi itu”

³ Lihat : `Ali bin Hādiyah, Balhasan al-Balīsyh, al-Jailāni bin al-Hāj Yahyā, h.409; Al-Marbawi, j.1, h.253; <https://almaany.com>

⁴ Lihat : Al-Syarbīni, j.3, h.37; Al-Syīrāzi al-Fairūzābādi, j.2, h.307; Al-Syarbīni, h.413; Al-Jazīri, j.2, h.319

⁵ Lihat : Al-Bukhāri, h.243 (Hadis ke-2069)

⁶ Lihat : Al-Bukhāri, h.295 (Hadis ke-2513)

Hukum Gadaian Menurut *Fuqahā'*

Empat mazhab fiqh bersepakat mengatakan bahawa gadaian dalam hutang adalah diharuskan samada ketika dalam musafir ataupun ketika bermuqim. Mazhab yang empat juga mengatakan bahawa gadaian dalam berhutang bukanlah wajib tetapi diharuskan kerana ia adalah sebagai ganti atau sebagai jaminan kepada hutang yang diambil daripada seseorang agar hutang tersebut dibayar kembali. Jika sekiranya hutang tersebut gagal dibayar, maka ianya akan diganti dengan barang gadaian tersebut samada semua atau separuh daripada nilainya.

Dalil yang mengatakan harus melakukan gadaian ketika dalam keadaan *safar* ialah ayat 283 dalam surah *al-Baqarah* ini;

﴿وَإِنْ كُنْتُمْ عَلَى سَفَرٍ وَلَمْ تَجِدُوا كَاتِبًا فَرِهْنٌ مَقْبُوضَةٌ﴾⁷

Maksudnya;

"Dan jika kamu berada dalam musafir (lalu kamu berhutang atau memberi hutang yang bertempoh), sedang kamu tidak mendapatkan jurutulis, maka hendaklah diadakan barang gadaian untuk dipegang (oleh orang yang memberi hutang)"

Manakala dalil yang mengatakan harus untuk melakukan gadaian ketika dalam keadaan *hādir* ialah hadis yang diriwayatkan oleh Muslim daripada Saidatina `Āisyah RA;

﴿أَشْتَرَى رَسُولُ اللَّهِ صَلَّى اللَّهُ عَلَيْهِ وَسَلَّمَ مِنْ يَهُودِيٍّ طَعَامًا، وَرَهْنَهُ دِرْعًا مِنْ حَدِيدٍ﴾⁸

Maksudnya;

"Rasulullah SAW pernah membeli daripada seorang Yahudi makanan, dan menggadaikan baju besi yang dibuat daripada besi"

Dalam riwayat yang lain bahawa Anas bin Mālik RA berkata;

﴿وَلَقَدْ رَهَنَ النَّبِيُّ صَلَّى اللَّهُ عَلَيْهِ وَسَلَّمَ دِرْعًا لَهُ بِالْمَدِينَةِ عِنْدَ يَهُودِيٍّ بِالْمَدِينَةِ وَأَحَدَ مِنْهُ شَعِيرًا لِأَهْلِهِ﴾⁹

⁷ Lihat : Surah *al-Baqarah*, ayat : 283

⁸ Lihat : Muslim, j.3, h.1226 (Hadis ke-1603); Al-Bukhāri, h.243 (Hadis ke -2068)

⁹ Lihat : Al-Bukhāri, h.243 (Hadis ke-2069)

Maksudnya;

“Nabi SAW pernah menggadai satu baju besi milik baginda di sisi seorang Yahudi di Madinah, dan baginda mengambil daripadanya gandum untuk makanan ahli keluarganya”

Berikut adalah perincian pendapat mazhab yang empat dalam masalah gadaian dalam hutang;

1. Mazhab Hanafi¹⁰

Berkata al-Sarkhosī RH bahawa gadaian dalam hutang adalah diharuskan samada ketika ketika musafir ataupun ketika bermuqim. Baginda Nabi SAW sendiri pernah melakukannya ketika baginda bermuqim di Madinah.

2. Mazhab Mālikī¹¹

Berkata al-Ru`aini RH bahawa gadaian dalam hutang adalah harus hukumnya samada pada ketika musafir atau pada ketika dalam keadaan bermuqim. Setiap apa yang diharuskan untuk dijual beli, maka ianya juga harus untuk dijadikan sebagai harta gadaian kerana ianya bernilai.

3. Mazhab Syāfi`e¹²

Berkata al-Syīrāzī dan al-Syarbīni RH bahawa harus melakukan gadaian bagi hutang yang diambil samada ketika dalam musafir. Begitu juga harus melakukan gadaian bagi hutang yang diambil ketika dalam keadaan bermuqim kerana baginda Nabi SAW sendiri pernah melakukannya ketika baginda berada di Madinah.

4. Mazhab Hanbali¹³

Berkata Ālī Bassām dan al-Maqdīsi RH bahawa harus melakukan gadaian ketika dalam keadaan musafir sebagaimana harus melakukan gadaian ketika dalam keadaan bermuqim.

¹⁰ Lihat : Al-Sarkhosī, j.11, h.61

¹¹ Lihat : Al-Ru`aini, j.5, h.2

¹² Lihat : Al-Syīrāzī al-Fairūzābādī, j.2, h.307; Al-Syarbīni, h.413; Al-Dimasyqi, j.1, h.263

¹³ Lihat : Ālī Bassām, h.507; Al-Maqdīsi, j.4, h.215

Dalil Keharusan Gadaian Di Sisi Empat Mazhab

Keharusan melakukan gadaian ketika dalam musafir disebut pada firman Allah SWT;

﴿ وَإِنْ كُنْتُمْ عَلَىٰ سَفَرٍ وَلَمْ تَجِدُوا كَاتِبًا فَرِهْنٌ مَّقْبُوضَةٌ ﴾¹⁴

Maksudnya;

“Dan jika kamu berada dalam musafir (lalu kamu berhutang atau memberi hutang yang bertempoh), sedang kamu tidak mendapatkan jurutulis, maka hendaklah diadakan barang gadaian untuk dipegang (oleh orang yang memberi hutang)”

Adapun dalil keharusan gadaian daripada al-Sunnah pula ialah sebagaimana hadis yang diriwayatkan oleh Anas bin Mālik RA;

﴿ وَلَقَدْ رَهَنَ النَّبِيُّ صَلَّى اللَّهُ عَلَيْهِ وَسَلَّمَ دِرْعًا لَهُ بِالْمَدِينَةِ عِنْدَ يَهُودِيٍّ وَأَخَذَ مِنْهُ شَعِيرًا لِأَهْلِهِ ﴾¹⁵

Maksudnya;

“Sesungguhnya Nabi SAW menggadaikan baju besinya ketika di Madinah kepada seorang Yahudi, dan baginda mengambil daripadanya gandum untuk diberikan kepada ahli keluarga baginda”

¹⁴ Lihat : Surah *al-Baqarah*, ayat : 283

¹⁵ Lihat : Al-Bukhāri, h.243 (Hadis ke -2069)

Sejarah Al-Rahnu Di Malaysia

Perniagaan pajak gadai di Tanah Melayu sudah bermula sejak abad ke-15 lagi, dan ianya bermula apabila diperkenalkan oleh pedagang-pedagang Cina pada zaman Kesultanan Melayu Melaka. Perniagaan itu terus berkembang apabila wujudnya kegiatan melombong bijih timah di Larut, Perak pada abad yang ke 19. Pada peringkat permulaan perkembangan, perniagaan ini tidak tertakluk kepada undang-undang yang tertentu. Bagaimanapun, pada zaman pemerintahan Inggeris, sistem pajak gadai berlesen mula diperkenalkan dengan pewartaan Ordinan Pajak Gadai 1871.

Pada mulanya, ordinan itu hanya diaplikasikan di Negeri-negeri Selat sahaja, kemudiannya diikuti oleh Negeri Bersekutu dan akhirnya Negeri Tidak Bersekutu. Walaupun pada masa itu sudah wujud enakmen pajak gadai di negeri tertentu, seperti enakmen Pajak Gadai 1917, undang-undang pajak gadai pertama di Johor, usaha untuk menghasilkan satu akta yang seragam sudah berjaya dilakukan dengan penguatkuasaan Akta Pajak Gadai 1972 pada Jun 1973.¹⁶

Sistem pajak gadai secara konvensional ini menjadi popular di kalangan mereka yang ingin mendapatkan wang tunai dengan segera. Sistem pajak gadai secara konvensional ini sememangnya mempunyai banyak kelemahan dan kekurangan. Antaranya ialah kadar bunga yang terlalu tinggi dan berat sebelah dan tiada notis diberikan bagi barang yang tidak dituntut atau tamat tempoh. Antara yang paling ketara adalah barang yang tidak dituntut akan dilelong tetapi duit lebihan disimpan oleh broker.¹⁷ Pajak gadai secara konvensional ini terikat dengan Akta 81 Akta Pemegang Pajak Gadai 1972.¹⁸

Inisiatif untuk menubuhkan pajak gadai Islam telah dibincangkan dalam mesyuarat Majlis Kebangsaan Bahagian Hal Ehwal Islam Malaysia pada April 1983. Mesyuarat mengusulkan agar Majlis Agama Islam Negeri, atau Bank Islam Berhad melaksanakan pajak gadai Islam. Usaha ini akan merupakan satu tanggungjawap untuk membebaskan masyarakat Islam daripada terus terlibat dengan riba yang diharamkan oleh Islam. Ia juga dapat menyelamatkan masyarakat Islam daripada terus ditindas oleh sistem pajak gadai konvesional yang secara terangnya sangat menindas.

¹⁶ Lihat : Berita Harian, Agama, Rabu 30 Januari 2008;
<http://agamaberitaharian.blogspot.com/2008/01/bersama-yapeim-al-rahnu-pilihan-terbaik.html>

¹⁷ Lihat : <http://e-muamalat.islam.gov.my/images/pdf-bahan-ilmiah/arrahn-ilim.pdf>

¹⁸ Lihat : Undang-undang Malaysia Cetakan Semula, Akta 81 Akta Pemegang Pajak Gadai 1972, Mengandungi segala pindaan hingga 1 Januari 2006, Diterbitkan oleh Pesuruhjaya Penyemak Undang-undang Malaysia, Di Bawah Kuasa Akta Penyemakan Undang-undang 1968, secara usaha sama dengan Percetakan Nasional Malaysia Berhad

Pada tahun 1990, bekas Gabenor Bank Negara, Allahyarham Tan Sri Jaafar Hussin berucap dalam sebuah forum di Pulau Pinang tentang betapa perlunya sebuah institusi kewangan Islam menerusi sistem perbankan memberi kemudahan kepada mereka yang tidak berkemampuan untuk memperoleh wang melalui cagaran. Rentetan daripada itu, maka kerajaan pusat telah menyarankan agar dilaksanakan sistem pajak gadai Islam al-Rahnu di seluruh negara menjelang tahun 1993.

Kedai al-Rahnu pertama ditubuhkan pada 1992 oleh Kerajaan Negeri Kelantan. Kemudiannya Majlis Agama Islam dan Adat Melayu Terengganu (MAIDAM) telah mengambil langkah proaktif dengan menubuhkan Muassasah Gadaian Islam Terengganu (MGIT) pada 23 Januari 1992 iaitu pajak gadai Islam pertama diwujudkan di Malaysia. Matlamat penubuhan Muassasah Gadaian Islam Terengganu (MGIT) adalah disifatkan sebagai serampang dua mata iaitu membebaskan umat Islam di Terengganu dari terus dibelenggu gejala riba yang dimanipulasi oleh sistem pajak gadai konvesional pada ketika itu, dan sebagai program peningkatan taraf sosio ekonomi umat Islam di Terengganu selaras dengan Seksyen 13 Enakmen Pentadbiran Hal Ehwal Agama Islam 1986.¹⁹

Yayasan Pembangunan Ekonomi Islam Malaysia (YPEIM) kemudiannya mencadangkan al-Rahnu diperkenalkan pada 1993. Koperasi pertama menjalankan al-Rahnu di Malaysia ialah Koperasi Bank Rakyat pada Oktober 1993 dengan kerjasama YPEIM. Pada 2004, sejumlah 22 koperasi terlibat dalam perniagaan ini dengan 125 pusat di seluruh negara. Bank Rakyat memiliki 127 pusat di seluruh Malaysia.²⁰

Yayasan Pembangunan Ekonomi Islam Malaysia (YPEIM) menjadi pelabur utama dan penyelaras dana pelaburan, dan Bank Rakyat bertindak sebagai pengurus pelaksanaan operasi skim tersebut. Projek itu dijalankan berdasarkan kepada konsep *Mudārabah Khas (Muqayyadah)*. Skim yang bermula pada 21 Oktober 1993 itu melibatkan pelaburan berjumlah RM5 juta daripada Yayasan Pembangunan Ekonomi Islam Malaysia (YPEIM) dengan pembahagian keuntungan 70:30. Melihat kepada sambutan yang menggalakkan daripada pelbagai lapisan masyarakat, Yayasan Pembangunan Ekonomi Islam Malaysia (YPEIM) kemudian menjalin kerjasama dengan Bank Islam Malaysia Berhad (BIMB) dan Bank Pertanian Malaysia. Pelaksanaan skim itu di semua institusi kewangan adalah selaras dengan hukum syariah.

Beberapa badan pergerakan koperasi dan kerajaan negeri turut menceburkan diri dalam bidang itu. Contohnya, kerajaan Perlis telah menubuhkan sistem pajak gadai Islam pada Januari 1997. Antara badan pergerakan koperasi yang terawal dalam pelaksanaan skim ini ialah Koperasi Pengguna Pahang Berhad, Koperasi Gabungan Pekebun Kecil Perak Berhad dan Koperasi Kakitangan Kerajaan dan Badan-badan Berkanun Terengganu.²¹

¹⁹ Lihat : <http://maidam.gov.my/index.php/ms/profil/sejarah-penubuhan/2-uncategorised/456-sejarah-ar-rahnu>

²⁰ Lihat : <http://e-muamalat.islam.gov.my/images/pdf-bahan-ilmiah/arrahn-ilim.pdf>

²¹ Lihat : Utusan Malaysia, Selasa, 28 Mac 2006

Perbezaan Sistem Al-Rahnu Berbanding Konvensional

1. Tidak Mengenakan Kadar Faedah Atau Riba

Perbezaan utama antara al-Rahnu dan pajak gadai konvensional adalah pada perjanjian pinjaman yang dikaitkan dengan sesuatu ganjaran dan bukan pada gadaian itu sendiri. Dalam perjanjian al-Rahnu, pinjaman yang diberi tidak dikenakan faedah (interest) iaitu riba di mana riba diharamkan oleh Islam, berbanding pajak gadai konvensional yang menjadikan faedah sebagai sumber hasil kepada pemberi pinjaman dan ianya diharamkan oleh Islam. Ini sudah semestinya menepati tuntutan syarak serta dapat menyelamatkan seseorang daripada terjebak dengan dosa riba.

2. Nilai Gadaian Tidak Merosot

Nilai gadaian bagi barang yang ingin ditebus semula tidak merosot dan tidak berubah serta tidak berlaku penyelewengan. Tidak berlaku sebarang masalah di mana barang kemas seperti rantai emas apabila ditebus didapati kurang berat atau pendek sedikit daripada sebelum digadai. Ini bermaksud, tidak ada unsur-unsur penindasan dan kezaliman yang merugikan pemberi gadaian.

3. Wang Lebih Gadaian Dipulangkan

Sekiranya pemberi gadaian tidak berkemampuan membayar balik hutang yang ditanggungnya apabila tamat tempoh perjanjian, pemberi gadaian akan diberitahu atau dimaklumkan tentang barang gadaian yang terpaksa dijual. Sekiranya harga jualan melebihi baki hutangnya, lebihan tersebut akan dikembalikan. Ini berlaku kerana nilai pinjaman adalah jauh lebih rendah dari nilai barang gadaian.

4. Barang Kemas Yang Disimpan Selamat

Semua barang kemas yang disimpan dalam skim tersebut adalah selamat. Di mana, penerima gadaian akan menjamin pemeliharaan dan bertanggungjawab ke atas barang kemas yang diberi oleh pemberi gadaian. Dengan ini, pemberi gadaian tidak perlu risau dengan masalah pemeliharaan dan penjagaan barang kemas mereka sepanjang ia berada di pihak penerima gadaian.

5. Caj perkhidmatan Yang Rendah

Al-Rahnu menawarkan caj perkhidmatan yang rendah. Semua pengurusan di al-Rahnu melibatkan kos dan risiko yang rendah jika dibandingkan dengan pajak gadai konvensional. Pajak gadai konvensional menawarkan caj perkhidmatan yang tinggi dan ada juga sebilangan pemegang atau tauke pajak gadai konvensional yang menerima atau meminta wang pendahuluan dari penggadai walaupun akta melarang kegiatan tersebut.

6. Lebih Telus (*Transparent*) Dalam Timbangan

Pemberi gadaian juga tidak perlu risau dengan penipuan-penipuan yang sering berlaku semasa timbangan dibuat. Ini kerana, dalam al-Rahnu tidak akan berlaku sebarang unsur penipuan semasa timbangan dibuat dan nilai timbangan yang jelas akan ditunjukkan kepada pemberi gadaian. Manakala urusan timbangan secara konvensional berlaku sebaliknya di sebahagian kaunter gadaian konvensional.

7. Tempoh Membayar Balik Yang Munasabah

Al-Rahnu juga merupakan sistem pajak gadai Islam yang boleh bertolak ansur dengan pelanggannya berkaitan dengan tempoh membayar balik wang pinjaman yang telah dipinjam. Tempoh membayar balik yang dikenakan adalah munasabah dan boleh diterima pakai oleh semua pihak. Tidak seperti sesetengah pajak gadai konvensional yang kadangkala meminta wang tambahan daripada pemberi gadaian sekiranya pemberi gadaian ingin melanjutkan tempoh pembayaran balik pinjaman mereka. Ini akan menyebabkan berlakunya amalan riba kerana hutang bertangguh (*al-Nasā'*).

8. Pemberian Notis Kepada Penggadai Tentang Upacara Lelongan

Pihak penerima gadaian akan memberi notis kepada pihak penggadai sekiranya barang gadaian mereka hendak dilelongkan dan tempoh masa membayar balik untuk mereka telah habis. Dengan ini pihak pemberi gadaian akan mengetahui bahawa tempoh masa membayar balik yang diperuntukkan untuk mereka telah habis dan barang gadaian mereka akan dilelongkan.

9. Memberi Nilai Gadaian Yang Sepatutnya

Dalam sistem al-Rahnu, pembiaya akan memberi nilai gadaian yang sepatutnya dengan barang gadaian. Manakala dalam pajak gadai konvensional, tidak ada polisi yang menetapkan nilai tara atau kriteria untuk menilai barang gadaian.²²

²² Lihat : <http://www.arrahnu.org/>; <http://www.arrahnuxchange.com.my/v4/ms/utama/>; Suruhanjaya Koperasi Malaysia GP25: Garis Panduan Aktiviti Pajak Gadai Islam (Ar-Rahnu) ; <http://e-muamalat.islam.gov.my/images/pdf-bahan-ilmiah/arrahnu.pdf>

PENUTUP

Secara umumnya, keperluan manusia dalam melangsungkan kehidupan seharian, memerlukan kepada sumber kewangan yang mencukupi. Lebih-lebih lagi dalam suasana pandemik Covid-19 yang telah menyebabkan ramai kalangan masyarakat yang kehilangan sumber pendapatan. Namun sebahagian daripada mereka memiliki aset yang bernilai dan perlu dicairkan bagi mendapatkan wang tunai. Justeru, dengan sistem gadaian yang disediakan ia memudahkan urusan pihak-pihak yang berkeperluan kepada wang tunai. Namun sistem gadaian Islam di samping menunaikan keperluan tersebut ia telah menggariskan beberapa syarat gadaian agar penggadai mendapat hak mereka secara maksima serta mengelak daripada unsur penipuan, penganiayaan dan juga riba. Ini memberikan maslahah kepada penggadai. Manakala pemegang gadai juga mendapat keuntungan disebalik yuran simpanan harta gadaian yang dibayar oleh penggadai. Oleh itu dicadangkan supaya pihak kerajaan memperkasakan bahkan mewajibkan sistem secara Islam dijadikan polisi dan SOP kepada pihak-pihak yang menyediakan perkhidmatan gadaian.

RUJUKAN

1. *Muṣṭaf al-Madīnah al-Munawwarah, Mujamma` al-Malik Fahd Li Ṭibā`h al-Muṣṭaf al-Syarīf*, (1996M/1417H)
2. Tafsir Pimpinan *al-Rahmān* Kepada Pengertian al-Quran, Darul Fikir SDN BHD (Cetakan Kesepuluh 1999M/1420H)
3. *Al-Qurān al-Karīm Wa Tarjamatu Ma`ānīhi Ilā al-Lughah al-Indūnīyyah, Mujamma` al-Malik Fahd Li Ṭibā`h al-Muṣṭaf al-Syarīf*, (1997M/1418H)
4. Al-Bukhāri, Abī `Abdillāh Muhammad bin Isma`il bin Ibrāhīm, *Ṣahīh al-Bukhāri, al-Qāherah, Dār Ibni al-Jauzi*, (2010M/1431H)
5. Muslim, al-Imām Abu al-Husain Muslim bin al-Hajjāj al-Qusyairi al-Naisābūri, *Ṣahīh Muslim, Dār Ihyā' al-Kutub al-`Arabiyyah*, (1954M/1374H)
6. Al-Syarbīni, al-Syeikh Syamsuddīn Muhammad bin Muhammad al-Khaṭīb, *Mughni al-Muhtāj Ilā Ma`rifah Ma`āni Alfāz al-Minhāj, Dār al-Hadīth al-Qāherah*, (2006M/1427H)
7. Al-Syarbīni, al-Syeikh Syamsuddīn Muhammad bin Muhammad al-Khaṭīb, *al-Iqnā` Fī Hall Alfāz Abī Syujā`*, *Dār al-Hadīth al-Qāherah* (2014M/1435H)
8. Al-Syarbīni, al-Syeikh Syamsuddīn Muhammad bin Muhammad al-Khaṭīb, *al-Iqnā` Fī Hall Alfāz Abī Syujā`*, *Dār al-Kutub al-`Ilmiyyah Beirūt Lubnān*, (1994M/1414H)
9. Al-Syīrāzi al-Fairūzābādi, Abī Ishāq Ibrāhīm bin `Ali, *al-Muḥazzab Fī al-Fiqhi al-Syāfi`e, Syarīkah al-Quds Li al-Nasyri Wa al-Tauzī`*, (Cetakan Pertama 2012M/1432H)
10. Al-Jazīri, `Abd al-Rahmān, *al-Fiqhi `Alā al-Mazāhib al-Arba`ah, Dār al-Kutub al-`Ilmiyyah, Beirūt Lubnān*, (1986M/1406H)
11. Al-Sarkhosī, Abū Bakr Muhammad bin Ahmad bin Abī Sahl, *al-Mabsūt Fī al-Fiqhi al-Hanafī, Dār al-Kutub al-`Ilmiyyah*
12. Al-Marbawi, Muhammad bin Idrīs `Abd al-Raūf, *Qāmūs Idrīs al-Marbawi*, Dār al-Fikri Kuala Lumpur, (1990M/1410H)
13. Al-Dimasyqi, al-Imām Taqiyuddīn Abī Bakr bin Muhammad al-Husaini al-Syāfi`e, *Kifāyah al-Akhyār Fī Halli Ghāyah al-Ikhtiṣār, Dār al-Salām Li al-Ṭibā`ah Wa al-Nasyri Wa al-Tauzī` Wa al-Turjumah*, (Cetakan Keempat 2013M/1434H)
14. Ālī Bassām, `Abdullāh bin `Abd al-Rahmān, *Taisīr al-`Allām Syarh `Umdah al-Ahkām, Ibn Ṣālih Dār al-Fikri Li al-Ṭibā`ah Wa al-Nasyr Wa al-Tauzī`*, (1999M/1420H)
15. Al-Maqdisī, `Abdillāh bin Ahmad bin Muhammad bin Qudāmah, *al-Mughni, Dār `Ālam al-Kutub al-Riyāḍ*, (1996M/1417H)

-
16. Al-Maqdisi, Muwaffiq al-Dīn Abī Muhammad `Abdullāh bin Ahmad bin Muhammad bin Qudāmah, *al-Mughni Li Ibni Qudāmah*, *al-Maktabah al-Islāmiyyah*
 17. Al-Maqdisi, al-Syeikh al-Imām Ibnu Qudāmah, *al-Syarhu al-Kabīr*, *Dār al-Hadīth al-Qāherah*, (1994M/1415H)
 18. Al-Ru`aini, Syamsuddīn Abū `Abdillāh Muhammad bin Muhammad bin `Abd al-Rahmān al-Ṭarablisi al-Maghribi al-Maliki, *Mawāhib al-Jalīl Fī Syarhi Mukhtaṣar Khalīl*, *al-Maktabah al-Islāmiyyah*
 19. Berita Harian, Agama, Rabu 30 Januari 2008
 20. Utusan Malaysia, Selasa, 28 Mac 2006
 21. <https://almaany.com>
 22. <http://maidam.gov.my/index.php/ms/profil/sejarah-penubuhan/2-uncategorised/456-sejarah-ar-rahnu>
 23. <http://e-muamalat.islam.gov.my/images/pdf-bahan-ilmiah/arrahn-ilim.pdf>
 24. <http://www.arrahn.org/>
 25. <http://www.arrahnuxchange.com.my/v4/ms/utama/>
 26. <http://e-muamalat.islam.gov.my/images/pdf-bahan-ilmiah/arrahn.pdf>